



Nuuk, 13. oktober 2009

Inatsisartut suleriaasianni § 36 immikkoortoq 1 naapertorlugu matumuuna Naalakkersuisunut apeqquteqarpunga, ima ittumik:

Siumup inatsisartuutitai sapaatit akunneri tamaasa suliffeqarfinnut paasisassarsiorsinnaasarlutillu immikkut ilisimasalinnik oqalugiartussanik aggersaasarput, tamarmik suliatsinnut inatsisiliornitsinnullu attuumassuteqartut ilisimaarilluarfiginissaat siunertaralugu. Sapaatip akunnerata siuliani Nukissiorfiit sammineqartussanngormata suliffeqarfimmut pulaarsimavugut nukissiuuteqarnermut tunngasunik apeqqutissaqarluta. Maanna apeqqutissaqaqqikkatta ataatsimeeqatiginnikkumalluta saaffigineqqinnitsinni ilisimatineqarpugut Nukissiorfimmik ataatsimeeqatiserinninnerit tamarluinnarmik siunissami naalakkersuisoq Jens B Frederiksenimut saaffiginnissutigineqaqqaartariaqartut, taamaammallu nukissiorfiit suliffeqarfiummat tamanut kiffartuussisoq pisussaaffeqartorlu saaffigineqarnermini sullissinissaminut, apeqqutigiumavara saaffiginnissutissat tamarmik maana sooq naalakkersuisoq Jens B Frederiksen-mut tamarmik saaffiginnissutigineqaqqaartariaqalersimanersut ?

(Inatsisartuni ilaasortaqa Aleqa Hammond, Siumut)

Tunngavilersuut:

Siumup inatsisartuutitai sapaatip akunneri tamaasa nutaanik qulequtaqarlutik ataatsimiinnermi saqqummiussisitsisarpoq imaluunniit suliffeqarfinnut pulaarsinnaasarput, apeqqutaalluni oqaluuserineqartussat inatsisartuni sunik qulequtaqarnermut siunertarerpjarlugu oqaluuserineqartunut ilisimasaqarluarnissaq piareersarluarnissarlu. Sapaatip akunnerata siuliani nukissiuuteqarneq oqaluuserineqartussaammat Nukissiorfiit pulaarsimavagut saqqummiussivigineqarnissarput siunertaralugu siunissamullu nukissiuuteqarnikkut nunatta imminut napatinnissaanut eqqarsaatit aallaavigalugit apeqquteqarsinnaalluta soorlu brinti, erngup nukissiornerit il.il. Nukissiorfiup pisortaata saqqummiussai qujaruppavut atorfilittatullu pisussaaffini ajunngilluinnartumik saqqummiuppai imatut paasillugu politikikkikkut aaliangersugassat iserfiginngilluinnarlugit.

Siumup inatsisartuutitai sinnerlugit pulaaratta kiffartuulluarneqarsimanerput pillugu qujassummik allagaqarpunga, tassungalu atatillugu ilanngullugu qinnuigaara oktoberip 20-ni nutaamik sivikitsumik ataatsimeeqqilaarsinnaanersugut apeqquteqarlunga, maanna allanik aamma apeqqutissaqaratta. Tassunga atatillugu Nukissiorfiit pisortaata Svend Hardenbergip allaffigaanga imatut aamma oqaasertalinnik:

“Ataatsimiinnissamut qinnutigineqartoq aatsaat qinnutigineqarsinnaavoq naalakkersuisoq Jens B Frederiksen attavigineqaqqaarneratigut, ikinngutinnersumik inuulluaqqusillunga Svend Hardenberg, nukissiuuteqarnermut pisortaqa”

Maanna apeqqutigiumavara sooq Nukissiorfiup pisortaa ataatsimeeqatigini maneqarnerani maanna naalakkersuisoq Jens B Frederiksen attaveqarfigineqaqqaartariaqarneranik aaliangiisoqarsimanersooq aammalu suna tunngavigalugu taama maanna isiortoqalerpa, ilanngullugulu paaserusuppara suliffeqarfiit tamarmik maanna aamma taamatut piumasaqarfigineqalersimanersut ?

Eqqaasitsissutigissangakku ullut qulit suliffiusut qaangiutsinnagit apeqqutiga akineqarsimassasoq.

Ikinngutinnersumik inuulluaqqusillunga
Aleqa Hammond, Siumut



SIUMUT

INATSISARTUNI ILAASORTAATITAT / LANDSTINGSGRUPPEN